

四庫全書

集部

欽定四庫全書

集部
弇州四部稿卷三
四

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官檢討_臣盧應

謄錄監生_臣韓騰

欽定四庫全書

弇州四部稿卷三

明 王世貞 撰

詩部

風雅類

明雅二十五首

上帝之什

有序

夫人皇以前邈乎若在若亡不可詳已肇畫開天明

農設教所創因非一君也遏洪水祛猛虎其所除害
眇也放南巢獐牧野其所救人暫也然而萬世頌功
焉神州有九禮樂之都也先王之趾代在矣昔在商
奴羯鮮氏羌以及索鹵典午忽諸爰宅函夏石晉割
幽乃九之一宋棲江以左乃九之六蒙古稱帝乃九
之九含齒戴髮尺抱而上疇弗稽顙脞鞠哉厥後揭
竿斬木輦爲驅除難耳而高皇帝提馬箠田家度劉
而逐之北填海日月重朗冠裳儼然家絃戶誦人知

禮義十易世矣於戲盛哉夫姚姒揖讓公孫徂討熙
古者不以跡差仁也是高皇帝之無始豐績偉烈也
而有司闕焉不以備樂章臣愚昔治刀筆從法吏之
末又出為外臣非其任竊薰日之遠久恒恐一旦溘
露勉強希則古昔清廟之遺凡十四章藏之家闔庶
幾采風之吏汰其微繁以備揚摧萬一云耳

上帝曰咨爰攬宏綱海內宴然日月重光泗流湯湯厥
源清明適發我高皇

上帝曰咨祖仁玄德惟身湛澤惟民天之既厭元則莫
我屯雲龍驤良索乃降

篤高皇帝錫之益益用凶德蚤罹於厄亦勤於穡亦逃
於釋是省是即靡務不繹

篤高皇有晦含章迫發厥慶烈烈元戎在濠之陽駿拔
于行謀夫孔臧遂纂大邦

天之闕隘維江若帶惟鍾若礪樓船黷黷旭日在鎧撫
有江介以劉蠡蠆是蒂是刈

彭蠡渾渾火波掣雲旦師陳軍立埽厥氛震澤之瀆躑
躅惟羶王旅于勤袒縛以奔

帝省其配淑人后氏夙夜在公言御言劑帝省其輔曰
善長基如心如股曰達遇春如髀如膂

達往徂征駟車彭彭庵廬冥冥如獄不驚春也輔行暗
烏迅霆飄搖旆旌目靡衡兵

玄黃在筐漿食攸同九衢若夷市不改容胡遁於荒民
即其宮誰其將者太傅魏公

乃下閩粵乃徂嶺服田秦巴蜀滇池羌笮庸麋百濮不
寧方來悉臣悉僕

元之孫子厥麗靡紀改辯承冠盤躅其趾詩書九有曷
不汪濊載俶昆弟載俶父子明明日月闔闢更始

於戲高皇煥肅其制濟濟列辟大夫三事亦既精白
亦既凜畏無譎於室動言及累

於戲高皇聖躬聿脩翼翼小心以敬迓休聲色无荒无
畋於游无好是危言无忽是遠猶

莫崇匪乾峻功符之莫麗匪陽昭明儀之式廓版圖寓
宇其家光彼黃虞曷厲是滌除唯儉唯恭皇賁厥謨

上帝十四章一章章七句五章章八句一章章
九句二章章八句一章章十句二章章八句一
章章十句

皇哉之什

有序

皇哉頌孝皇也禮祖有功宗有德漢代令郡國咸
祀太宗配高祖則以德也我列帝之丕承蓋靡不赫

赫然稱聖矣然至於今田畯野老獨於孝皇慘
乎怛兮有不竟之思何也恭儉豈可以聲音笑
貌為哉愚故竊從所繇畧為頌一章以繼高皇
之後至於玄德盛化挂漏之譏固所未暇悉耳
奕奕國枋累累如岡九有茂明鬱積融昌帝念蒸氓以
篤孝皇孝皇哉

皇統俶纂時于嬰冠黜黜千嗜淵穆有燦惟函惟璞惟
琢惟瓚孝皇皇哉

帝曰宰怨母即而家予著蔡是趣恕拜稽首對敬休謨
佛逆為愉罔言不俞

齋宮覺覺皇肅厥容爰屏厥明爰塞厥聰上帝居歆百
神類從

辟雍濟濟皇肅厥珥爰闕厥聽爰廓厥視有來青衿是
則是媚

惟苑在西勿剪蕪萊皇戒于離噦噦鸞輶喈喈鷓絲皇
奉太母式燕以嬉無已太康適言旋歸

惟苑在北勿剪蕪棘皇戒于逸宛宛醇鬪煌煌金鎬皇
奉太廟式狩以獵無已太康適言旋息

我我諍冠有薦其顏沈沈講惟有驚其端彼美翱翔既
衍且閑

皇曰有三老皇曰有司馬皇曰有御史爰庇爰啓爰父
爰子密勿共體佐予于理

皇曰司會女其予治毋析民之脂茹儉服素是積是資
亟賜賦租惠我蒸黎

皇之既徂落百辟卿士爰逮四海謳吟思瘳若喪考妣
爰配覆載爰配我祖令聞不已為億世軌

皇哉十一章三章章七句二章章六句二章章
八句一章章六句二章章七句一章章八句

東門之什

東門不理於口而作也

東門之梓其文理兮豈其枳哉毋若而毀哉

東門之鷺其文郁兮豈其鵬哉毋若而詠哉

東門二章章四句

隰有木之什

隰有木感時虞身而作也

隰有木其喬則蠹師氏削爾以居風之飄斯卒隕卒隊
豈不爾詢匪爾之故

隰有葦其夭孔儀師氏緝爾以衣風之飄斯卒隕卒隕
豈不爾詢匪爾之為

隰有萑矣濕有推矣閔爾之乖然余已焉懷

隰有萑矣濕有推矣樂爾之愔然余已焉懷

隰有木四章二章章七句二章章四句

迷陽之什

迷陽閔浚恒蹈凶也

迷陽如束母胥子足伊其埽除視施則馥媒媒厥好以
余貽辱

迷陽如荼母胥子裾視施則馥伊其埽除媒媒厥覲以
余貽誅

迷陽施施兮施離離兮將疾子治兮益子之菑兮

迷陽三章二章章六句一章章四句

菀菀者叢之什

菀菀者叢悲大臣教而中禍也

菀菀者叢孔集維鸞中一文鳥其鳴雝雝豈不爾類唯
爾之夸視棘則黍有捄在嘖躑躅毛跣塊不得吐凡今
之良無蹈厥隊

嗟我宰父惟王來綏疇不興止娥媯令儀五馬既同六

服孔加密雲油油雨竊其施淫來無端亦莫之何

人有恒言耳屬於墻塹崧踐華豈曰匪常逝弗洋洋至
菑湯湯何以自明曜靈西藏何用重明纖阿未揚

機斯伏矣惜其蹴矣機之蹴兮吁駭速矣機之伏兮伊
胡忸矣

苑苑者叢四章一章章十二句二章三章章十
句四章章六句

雨雪之什

雨雪賢者役勞於外且被讒也

雨雪滂滂我馬駟駟不有勞者誰其得寧受賦於旻亦莫敢明夫既寧止曰又淫止

雨雪霏霏我馬漣漣不有寧者厥勞焉施受賦於旻亦莫敢辭夫既勞止曰又謠止

厥謠惟詠匪齒以角豈不爾好裾接則涅

人亦有言投之有庠毋投有庠彼人奚臯

毋謂爾域毋謂爾回次縱生憧憧獨我之孽

毋謂余璠毋謂余靡魯曷不悄悄言思其端

雨雪六章二章章八句四章章四句

谷宮之什

谷宮刺上谷撫臣也

谷之宮不可以風疇為棟梁檝檝桑彼狡童兮稱干
城兮

谷之宇不可以雨疇為梁棟檝檝桑彼狡童兮稱藩
輔兮

谷宮二章章六句

田車之什

田車悲危人任危政也

毋御田車櫜其輓兮毋走乘丘傾而積兮于嗟積兮于
嗟輓兮

毋汎膠舟櫜其漿兮毋之反澨湛而藏兮于嗟藏兮于
嗟漿兮

田車二章章六句

麇麇之什

麇麇奔其親難而作也

濯濯麇麇逝言竄枳雖則匪罟將創而趾我徂唯郊于
以矢死我嚴我誨創若周體天之方威赫焉焉理

交交黃鸝逝言竄棘雖則匪罟將罟而翼我徂唯野于
以矢賊我嚴我鞠罟若通息天之方怒赫焉焉辟

禍之初萌厥亦細微嗟彼巧言如雨如霏其端如絲潤
裏孔滋匪天行之人十能之

禍之方張厥亦縱橫嗟彼暴言如庇如霆其疾如颺受
膚孔戕匪天成之人百能之

天兮人兮我胡不陳翼翼君子篤棊忱恂玃狁內侵女
柅其輪王曰禦侮女錫女珍師曰延侮母再而身皇皇
大明庶幾麗旻

人兮天兮我曷敢宣翼翼君子靖恭塞淵玃狁內侵女
躅其轅師曰延侮女憖女愆王曰侮予母令而全皇皇
大明庶幾麗乾

麇麇六章二章章十句二章章八句一章章十
二句

鍾山之什

鍾山紀留京亂也亂卒殺大臣詔撫之母譙訶也
巖巖鍾山閔我國植赫赫留都副我國靈萬雉登登九
墉薨薨凡百有位則于天京三事大夫是瞻是馮

嗟爾大夫胡弗靖共泄泄司馬斷斷司農去食去信厥
兵曷終一夫跳踉刃戕於胸為蝨為螟乃蠶乃蜂

司農逝矣司馬止矣司農逝矣惟國之毒司馬止矣惟國之恥先民豈不言施生僂死毋縱桀逸毋泄櫝毀使者于來虎喙以壑使者于返虎翼以角虎翼以角疇不靡止虎冠以游疇不擬止太師謀之以報天子

鍾山四章章十句

醇駟之什

醇駟悲戍卒也寇以四時至久戍不得解嚴也
醇駟惟皇鏞賁其鏜赤帝重英游環鏘鏘蒙虎輝煌在

薊之陽在薊之陽堠戍相望

零雨霏霏公但不歸
蟪蛄繡戈有魚在錡
吐鱗離絲角解筋糜
母爾施施獫狁孔滋

自昔徵兵爰始改霜
今我啟行蔚彼青陽
及霜遣矣及冰而轉
青陽晚矣三時靡選

稗我甫田鷓鴣我故
墉篤老在公婦困於
紅疑疑官胥以佐歲
凶豈不懷歸王事靡
終

維金與帛司農所宣
勞我璽書什伍在軒
褐暑絺霜半

菽并殮豈不懷悲沈深九閻

王曰師氏女其于輔王曰保氏命女于里女其奔走女其禦侮于嗟耄矣式相好矣

醇駟六章章八句

澤蘭之什

澤蘭友不報卹也

澤蘭之皜兮卒以黜兮惟子之教兮使我不終好兮
澤蘭之芬兮卒以葷兮惟子之憐兮使我愧弟昆兮

子在諱兮毒若積兮饁予之食兮

予顛躓兮子泄泄兮代越視兮

予之友也予之謬也人之多言不足道也

子之友也予之疚也人之多言亦可醜也

澤蘭六章二章章四句二章章三句二章章四

句

奕之什

奕叙難也父懼於咎未雪其友俞氏遺之詩叙以答

也

奕奕昌運炎元后尚鬱蒸哉應龍斯奏猗我瑯琊寔
克英胄顯祖之假以錫我父是孽是苞是穎是茂

獫狁孔熾蠶我冀方我父扞之爰城大邦大邦維城千
雉不崩四牡其駟爰錫爰旌爰作卿士朱紱皇皇

王曰仲氏島夷為讐匪夷匪猶女往作辟盜軫喬矛鋪
敦旋抽剪棘輦路以遏衡流樵李之師執訊獲醜

狡狡島夷思復其痾番番餘皇剽我井里逝梁發笥敝

廬如燬曾是我人不恤其梓方舟厲兵用濯厥恥

帝曰嘉哉女鎮于輔作朕股肱奔走禦侮何以申之鏐
盪裒蹄何以重之織文縠絲召伯之祿逮爾孫枝

父拜稽首孫膚殷錫諄諄嗣人匪樹莫克晝爾戎行宵
于籌畫亦既絲鬢亦既駢足刷克厥私以播休德

曰余沖人選於譽髦甫刑既攻乃佐爽鳩蹠辭好佻弗
剪其驕再沐恩綸出藩齊郊鉤膺喬喬露冕逍遙

曰有介弟初辭於稚豈弟干祿超彼素士維日而中維

月而望曷怙不顛於柏峴罔寤寐有標食居不遑

飄風自南翳昧黃道有晤靜女思媚思好靜女之來于
色于笑曷慎脩哉載吽載噉長舌伎哉我脩則悼

飄風自南煽我天威司寇民之瞻匪善翫韋天威赫曦
在邇蔑遺我父豈不勤小子是離靜言思之痗矣莫追
言裂其裳言絺其冠斲我乘車縱牡淄湍奏鼓大廷割
析腎肝人亦有云處死實難匪已之難虞彼狴犴

有斐君子德音昭融肅如清颺釋我蘊隆於燭大明既

西則東霈澤霈沾庶逮父以躬甫耒于耜君子之從

奕奕十二章章十句

天梁之什

天梁賦離宮也漢有天梁宮追言之

鬱彼崇墉天梁造空矯如飛龍脩如蟠螭越嶺汎江以
達大邦慄兮慄兮兆室之室也噫

鬱彼崇譙天梁造霄煥若霞綃偉若雲寮自淮徂漕以
達大朝屯兮屯兮兆人之人也噫

天梁二章章八句

岱宗之什

岱宗思友李氏也

瞻彼岱宗伏雲濛濛有美君子言栖其宮峰何剝施厓
且靡彼君子哉

瞻彼濟瀨伏流濺濺有美淑人言卜其舍水何齋淪清
且漣彼淑人哉

自我不覩徂寒迨暑葯房翛翛粉澤如赭豈無令顏誰

適子處

自我不覩徂暑再寒蕙軒軻軻粉澤如丹豈無皓齒誰
發子歎

岱宗四章二章章七句二章章六句

維夏之什

維夏賢者覩時而遯以寓感也

維夏有霰冬則雷兮赫彼靈臺猗猗來兮血人於隈兮
維夏有電冬則燒兮赫彼阿閣鳴梟遊兮食母於苑兮

人之血也菑其所也母之食也誰育女也麟逝於磧鳳翔於野彼蒼者何

人之血也人之菑也母之食也育汝誰也麟戢其趾鳳擊其儀彼蒼者何

維夏四章二章章五句二章章七句

素華之什

素華賢者嬰難不得歸而作也

皎皎素華雕蒺藜之有懷清流含沙寔夥豈不駢衣踈

如宵裸

皎皎素絲朱綠移之有懷中林竊毛寔多豈不再餐怒
如朝饑

嚴霜在陽松柏萎黃厥材孔臧厥邁孔戕迷離芄芃於
彼高岡

嚴霜夏驕松柏焦燒厥謚孔喬厥質孔夭迷離芃芃於
彼高嶢

誰堂構是卹誰穴女墻室誰嬾婉嘉匹誰羅網讒疾謂

皇聽卑吞聲若噎

不鷓其巢風雨飄飆彼人如之何謂子嘒嘒雞鳴永矣
東方未暈

素華六章章六句

有暄之什

有暄紀南帥也威澤覃吳越上符瑞膺錫也
有暄者麋厥麋宜之如玉其輝差池差池遵彼山阿
有暄者鹿厥麋將之如玉其章尚羊尚羊遵彼山岡

言設其置臚我中除靜好孔愉萬年之符誰其虞者大
夫君胡

言設其冒臚我中殿靜好孔絢萬年之薦誰其獻者大
夫君憲

海人貿貿鷓張以吼飾甲援曹曷不疾鬪民曰寇只匪
寇則媾

海人僑僑獠狂以囂枉矢厲稍曷不疾要民曰仇只匪
仇則交

大夫如之何爰飛其捷九章煜煜八鑿蹠蹠雙旌獵獵
郁哉孫子曷不世業

兔離於羅亦澤其姿載驅載馳猿皙而脂龜角而岐思
媚君子云胡不宜猗歟大夫諸侯之師

有暄八章二章章五句四章章六句一章章七
句一章章九句

有家之什

有家羨逝也賢者創禍困憊不及逝者而作也

有冢累累松柏阿那黃鳥式嬾以歌子之今矣樂如之
何

有冢累累松柏阿那黃鳥式嬾以歌子之昔矣憂如之
何

朔風蕭蕭草不怨凋朔風條兮嗟子之暮兮不復朝兮
景風調調草不謝萼景風飄兮愉子之暮兮不復朝兮
有冢四章章五句

終風之什

終風女子遠其夫怨而自勵以正終也

終風自西零雨其絲灼灼夭桃怒如其離彼一而離此
胡不睽

終風自北零雨其冪灼灼夭桃類如其折彼一而折此
胡不忒

澤有王鴟原有雉兮耿兮鷲兮以游以厲兮庶予契兮
原有鳩澤有陽鱈兮淫兮恍兮以泳以翱兮母予撓兮
終風四章二章章六句二章章五句

維旄之什

維旄會于鱗于邢而作也

維旄第離在澤之涓子來自燕于以將睽
維旄第奮在澤之涓子之來邢于以將贄
既覲則降胡愒其憂河嶽中移兩曜不仇
白駒既舖云何不轅裳衣在躬啟明流天
雖有舖漿無裨渴饑豈鮮弟昆在生則依
安能離形與子周還優哉游哉庶以愉年

維旄六章章四句

宜人之什

宜人武頌也武子為天官大夫而容為其母節
壽頌也

帝曰宜人光汝於武篤生令子為予詰輔
汝翟汝弟汝翳迺與玼兮流璵珮環鏘如

宜人曰吁昔余天是棄顧謂大夫惟余誕彌爾豈不偕
逝不康禋祀

惟余甘荼勤力夙莫提提厥躬以怙存者濯濯厥肝母
恧原土

惟余與汝念茲初艱母积於衢母家於官曷不臨履靖
共塞淵

金拜稽首夙莫祗服惟帝溫綸如丹如獲顧惟母訓如
石如藥

既肅于公言省其私酌彼金罍以頌維祺

哲爾母釐鬢爾母絲何以申之繩繩孫枝

載崇厥堂言樹之柏何以表之維霜維雪

載榮厥庭言樹之梓何以襲之維桃與李

猗歟宜人家人是宜豈惟家人之宜惟大夫是儀

恣哉大夫宜人是効豈惟宜人之効亦惟先子是耀

宜人十二章八章章四句四章章六句

維邑之什

維邑美曾侯也侯令金堂而良其邑人思而祀

之至于今有子叅省孫中丞又貴且賢也

維邑之陽有龍其岡疇布厥慶侯曾子良以邑敕寧
維邑之厓有龍其泝疇霈厥施侯曾惠釐以邑永和
番番黃叟共潔灑脩爰薦于侯侯實鞠育汝汝禰汝父
粲粲門子共潔脩灑爰用侯祀侯鞠育汝汝格汝祖
甘棠在國其葉疑疑疇忍摧之匪惟勿摧又護培之
甘棠在宮其蓋童童疇忍剪之匪惟勿剪又護衍之
汝祖汝父其德不遠夫是以勿摧剪之孫之子其聞彌
顯夫是以培衍

蜀績猗隆郢德猗豐我懷二邦敢用規於裔孫甫袞衣
西土繩其祖武

維邑八章六章章五句二章章六句

崧溟之什

崧溟悲嘉隆間事也

莫高匪崧寸木陟之莫浩匪溟涓流益之彼亢弗降孰
適與上彼盈弗挹孰適與濺授之竇也能毋與鑽也道
之蠹也能無為利也驕來無方兮噫曷之知侈來有端

今喜曷之治

右崧溟一章十八句

弇州四部稿卷三

欽定四庫全書

弇州四部稿卷四

明 王世貞 撰

詩部

擬古樂府七十五首

漢郊祀歌二十首

練時日

練時日帝徵祥血管殷醴齊芳闢天扉章上馳姦肅肅

靈來思祀崇蘭砌赤瓊注神光靈之宮曳紫旃冠翠華
雷霆激靈之車駢若組轡捷舞左右射靈之御佩瑤錯
履珠遺紛濟濟靈之贄掄阿錫吐芳潤巧笑倩靈之媵
靈之暑奏清徵飛霜激粟余體靈之夕籥珠爛鑿毛髮
炯若旦靈連蜷若有顧精流屬諧余慕倏而翔將安逝
願偕女霄以詣

帝臨

帝臨紫宮萬祗竦息天間穆穆以候舒闢神飈徐流爰

簸芳澤天喬飛走厥性咸若七曜孔儀九溟不波恬穆
象先徜徉太和

青陽

青陽開芟太皞司始窮陰夕遯農祥晨啟甲張氣飛仰
希大布條風披盪恍若寤寐敢假羲仲爰薦羊麥二有
熙熙唯春之錫

朱夏

朱夏蔚蕃炎帝司亨暢哉承離萬有茂明嘉雨霖霖惠

施下土汙萊剪削駕鼠伏竄敢假義叔薦雞逮救庶我
蒸黎無替景福

西顥

西顥澄素少皞司收萬實堅強秀穎內適芄芄木黍登
我場圃既徵既獮克詰外侮敢假和仲爰薦麻犬神之
庇之柔邇能遠

玄冥

玄冥陵勁顥頊司藏肅將天烈凋邊萬象墜戶坯城家

有蓋蓄天喬反始伏蟄斂育敢托和叔薦甌與黍毋泄
其真以為物媪

惟泰元

巍巍壽宮瑤瑰其闕於惟泰元稱天之尊胚始無極厥
眇泯泯兩儀漸闢五序因循凝精為曜微者星辰氣噫
而風亦潤以雨霏霏霧露粉澤下土夭喬鱗羽順性歸
所涵泳熙沐忘已繇造惟我思媚式獻以報玄酒既熟
鬱鬯斯馥有鮮者犢寔璽其角是裸是燔取彼羶薌以

達霄潢庶幾來翔玉弁俄俄瑤瑤洋洋延庇億年總齊
萬荒

天地

於皇上帝以逮富媪惟予有况爰父爰母靡嘉不承博
施九絃歲是用登百秩繩繩顯相列辟秉肅穆燎蕪蠶
韃成霧幄回干接翟散金輝下管鏞鼓竹啟絃璆然接
之泗濱浮玉皦如繹如亂而不絕肥芻之隄芍藥醬亨
炬粢有饑饉玄酒清苾奈樂何展詩奏音發升歌含宮

調角商徵多窈眇流梁激塵飛豐隆擊節風伯和玄黃
改色尊顏醜朱鳳委羽雍雍鳴赤龍夭矯迅長征垂休
肇貺示災禎神夕逶迤嘉孔明

日出入

日出入浴咸池度白石令我不得休息故令應龍在吾
東格澤在吾西長離在吾南玄武在吾北為我駢駕虛
無遨游太清都下視濁世一如浮蛆我欲返不得歡娛
安用憂愁悲思且為娛

天馬

帝圖協天馬生配乾行函地精歆明玉汗殷楮房為祖
龍為父爭迴颺掣流電晨瑯琊夕沙苑

又

天馬來來中國超虛無躡恍忽天馬來歸有道飛而黃
服余阜天馬來誰攻爾造不足虞劉累天馬來迅若禽
哂一竅萬馬喑天馬來出陰山六羸死金人還天馬來
余與女踰崑崙謁王母

天門開

天門旭呀然豁窳混沌金精發焱若電燭潢漢十二樓
裊魚貫琉璃蹙堦火齊鑿圮光液四射不可仰視屏翳
走約約馳霓掩靄若搖支朱明躍以東起纖阿迫以西
垂白榆歷歷河之湄天漿滌洄示昭儀天門開朝紫宮
中有使者冠芙蓉朱衣璧簡縹緗青類有疑無觸若冥
將上帝命况羣生顓精稽懇臚所希惠我來思庇蒸黎
皞皞帝功敏希夷

景星

煜煜景星爰燦其蓋休光彪蔚以開瑞始昔在強羸鼎
竄於泗炎德茂明汾睢是吐人文屬空金精流融百象
窺呈渺悠天工刷以純茅錦承之錯奏匏管文以絲酸
鵠鵬鳧二牢披粳餌甘芬行稻粢九醞泠泠寫瓊卮神
露湛湛布柯枝河伯拜享前致辭唯帝著錫鄙敢私九
有穰穰被恩釐家有蓋藏闡書詩樂哉君王萬歲期

齋房

煜彼三秀產自齋房后皇儲精適發帝祥律中金石于
霞有爛屑以玄飴後天之薦

后皇

后皇訢合昉孳兆因唯是慈愛私於我人降假明辟拼
乂式廓徂蠻逮貊靡屆不格

華煜煜

華煜煜醞澄鮮神下來辭鈞天帝親饗奏清縣神下來
度九閭龍伏趺豹續繙神下來空中蹕雲羽旂風瑤瑟

神下來史巫舞擘嘉胙行齊酤神下來脩娥侍睪騰媚
鬢若黛神安坐燎九蘊靈虬吭吐氤氲神欲休博山林
帷流蘇角明璫神之逝旌喬喬車斑斑馬沛沛神之愉
錫土田踰敦煌抵崑崙躡恍忽乘飄瞥流翠眊汾之瀼
望若覲不可即使余怱怱安極

五神

五神帝佐太乙肅象禦揚清蹕左青旂右白旂前朱芾
後玄圭誰者尊服中黃靈之朝肅然風臞神裊體冥羊

皂鬱金吐芬芳意恍忽精披靡若將翔復麗體簫沉雲
醞靈霈報休會澤無外

朝隴首

朝隴首蒐大荒帝沛祥白麟降嶷脩角文周定萬走憚
共余命駢玉輅導鸞旂左赤豹右青猊踰弱水寶金母
霞醴汎雲璈舉頰東牖顧中原杳如髮惜不歡御聽忽
掩飛世耳留蹕目窮旆朝玄圃夕沙墅坐明堂鋪四海

象載瑜

象載瑜角其牙越崑崙度流沙飄若霞赤鴈儀尾若蒂
聲中規秣者誰芝田禾薦宣房萬福來

赤蛟

帝臨渤衝波却橐天弧張廣樂赤蛟來俛其角芬牢醴
旨且博胡以薦酌海若露飄灑雲容喬澹復殫靈之醉
靈訢訢來媵予應昌符啟甘澍報豐歲多稔黍箱陳陳
萬億秭救陽侯波不芒尊出日際窮荒陳玉帛至梯航
赤蛟來靈柔之十萬禩思禎期

漢鏡歌十八曲

朱鷺

朱鷺矯以翔
倏如騰光騰逝耶之胡際耶曷不思翔高
而盡下彼茄之畔魚游雅雅茄蔽上矚謂是藏止他人
之怵思恬葬厥喙

思悲翁

思悲翁徂何之玄雲晦陰霜霰如期山耶溪耶斧枯網
冰于胡不歸炊麩作飯翁不及飯胡不從之游將廬井

是挽

艾如張

艾而張羅人之馬饑誰令艾之令禽驚磔飛羅不得禽
謫子無處禽大謹喜復集于所將禽與子齊適天地置
酒高堂中願爾百千萬歲

上之回

上之回至祠雍千靈洽百辟從上何以幸雍仁必世帝
禧鍾西臣流沙安息條支都梁鬱金符拔狡狴南蕩百

粵下瀨蒼梧孔翠桂蠹明珠珊瑚諸夏安服奇珍咸集
降王母假太乙答神貺行齋祀金支彩旒不見際庸
作歌耀萬世

翁離

擁離趾中築宮其顛高天無風自寒念欲移彼巖壑之
間何用重築宮杞梓榿栴豫章富奇材寧不知蕙與蘭
芬且芳將固焉哉

戰城南

戰城南城南壁黑雲壓我城北伏兵搗我東游騎抄我
西使我不得休息黃埃合匝日為青天糲糊鉦鼓發亂
謹呼敵騎斂旆迅驅樹若薺草為枯啼者何父收子妻
問夫戈甲委積血淹頭顱家家招魂入隊隊自哀謄告
主將主將若不知生為邊陲士野葬復何悲釜中食午
未炊惜其倉皇遂長訣焉得一飽為野風騷屑魂依之
曷不覩主將高牙大纛坐城中生當封徹侯死當廟食
無窮

巫山高

巫山高一何高湘水深一何深上有採木森森峰冠天
易暘陰流清夢托君音含思弄態若不任翠旗金支玳
瑁簪疑明乍晦迴何尋寓目岑岑蕩精淫迫欲近之殆
驚猜將遠離之復徘徊安能為期旦暮來巫山高高以
峻湘水深深以大願君王志意正澹愉穆絀非境後天
不凋三光並

上陵

上陵一何高高亘天宮闕武夫璘班又有青龍白獸列
峙雲端銀海汎瀾金鳧遊戲其間謂不如乘龍而見上
帝賜藥一九令汝遨遊自然肅肅橋陵豈藏衣冠壽千
萬歲樂不可言

將進酒

將進酒乘大白皇帝百千萬年垂衣御極輕刑稅陳禮
樂父不哭子戰鬥長息原田膻膻于何不獲童行至老
訢訢曷頰挹青陽蒸太和露為漿斗斛之一再舉霜顏

酌青天流眸忽為慶雲嗟彼麩藥胡以云

君馬黃

君馬黃臣馬白銜金羈度紫陌秣流沙
逕崑崙宴王母
瑤池濱餌靈饌天樂一何殷殷辭歸東土
和洽諸夏期
以三載復來晤女君餌靈饌貌青於童
臣賤眉宇颯如
秋霜安能御君驅馳八荒

芳樹

芳樹一何亂予思扶疎磊砢下臨蘭池上
有一雙之鳥

丹趾而翠衿自名為鸚鵡若怨似矜態何深繳繫之令
彼不得奮飛嗟我不得奮飛隴山遼遼望難歸雖有四
海志翻反翅剪竟焉施

有所思

有所思乃在大海之北卒然太行起若立壁驅車畏軸
折驅馬畏蹄反豈無珠宮貝闕黯靈或成碧有所思思
紛來其端類絲或紕之手弄一白珪云彼昔所治手美
之三載不忍釋漸成壁一心為一心安能兩相測嚴霜

下青陽晡朱華剝落不自持

雉子斑

雉子斑離其母來遨游田間田間多稻禾人於其所復
張羅倏忽被繫不能高飛前有鳥乃是其母羽毛摧披
大堪哀迫欲救之已焉哉相咎此稻禾為生復為菑曷
不覩南溟垂天之鳥千里萬里一徘徊雖有矰繳青天
曷猜

聖人出

聖人出奉昌期百六邁九五歸白帝死赤龍飛指函谷
度嶠坻封府庫戢兵師戒父老起傷痍五諸侯從義旗
獵天狼網妖鴟裂茅胙鞏鴻基垂百祀永無為

上邪

上邪與君相知譬彼結髮而盟山摧海枯志不移白日迴
矚肝膈洞披我手君腕用不得私車輪壞馬足罷東家
宴西家毀何用錢刀丘積橫金垂紫齷齪為

臨高臺

臨高臺瞰橫江井幹百尺鬱連空下何以江上何以空
不有北泳之魚必有南逝之鴻望不極兮意無終烏織
西兔投東袖中有短札漸將陳口語數百千言削為數
言復湮淪秦箏揚趙瑟侍曷不歡各心意人何樂樂得
遂

遠如期

遠如期招四夷皇帝坐殿上麒麟辟邪符拔駒駝拖脊
焉施弛苑囿付民居詔司農罷輪臺皇帝坐殿上千羽

舞兩階羣臣上壽玉卮單于來單于來

石流

石流者何湯湯使者來自扶桑赤日所起爛爛鑠金而
沃焦地不愛寶石來獻膏汎恒沙攀懸度奉明主餌之
與天齊數

岐山操

哀哀我民愚聖押主余之弗庇忍以貽虜率西水滸至
於岐下伐材中林陶瓦墾土民未休舍余敢寧處顧視

周原厥田膺膺是穠是棗以待來者

拘幽操

雷霆紛如日暍賢兮天威方煽庸敢怠兮不知紀歷寒
暑遞兮潛志消息悅驚寐兮庶幾君王一感悔兮臣不
愛死虞聖累兮

文王操

矯矯長離將翱翔兮肅雝和鳴中宮尚兮奉王威靈揆
不庭兮庶邦子來後夫亡兮上帝臨汝敢遑寧兮地道

無成中心傷兮

箕子操

于嗟王子跳兮生以係我宗祧于嗟王子磔兮死以殉
我社稷嗟余之不及兮默默以苟存棄道毀質兮離人
倫余貞疚兮敢望瘳晡日垂照兮沒齒奚尤

採薇操

上山採薇斧冰炊之曠蕩八垠顧瞻若縻何所非人季
昆是依違者互賢曷救其非句吳之鄉彼髡庶幾

越裳操

赫赫文考秉德淵冲奕世而仁八荒來同彼荒越裳侏
儻其音何以贄我有斐馴禽馴禽伊何耿介潔茂言薦
文廟言擾靈囿厥雝雝厥羽鶴鶴天質應金其音中
角嗟予小子敢尸國祥無怠無荒敬勗嗣王

龜山操

龜之山吐雲蔽龜山兮彼龜不知以雲藩兮予望魯社
龜兮間之君臣交賢誰兮辨之噫

將歸操

美哉水洋洋兮中有潛龍變無方兮餌欲蔽靈黠行藏
兮黽蜩伏窺胡弗祥兮盍歸乎來惠吾黨兮息魄虞淵
衆趨冥兮加我數年紹餘光兮

倚蘭操

猗猗叢蘭芬於幽阻波美蘅杜風所掄吐芄芄未黍罹
此暑雨槁實不恤世有饑者徘徊九方靡即寧處君子
悅心不在爵土嗟余已邁歸從蘭所

殘形操

有夢維狸兮而殘其形
吉兮胡祥災兮而使
我怵營臨深淵兮履薄冰
奉先人遺兮敢隳成

履霜操

皇旻佐威兮夜隕霜
苴屨茹衣兮透若亡
霜胡為兮加慚悽君
晨朝兮毋粟乃肌欲
自明兮傷君志淚滂
沱兮念宗祀

雉朝飛

有雉朝雊兮呼其雌
角角粥粥兮光陸離
我欲呼兮應者誰
陽春被天兮蹇獨憮
悽西烏欲沒兮余將安歸

別鵠操

雙鵠摩天兮翼中垂
臨當訣兮感仇離
有子無子兮帝命之輕
棄置兮誰適為妃

采芝操

坡陀崇阜草木菁茂
疇其饒者郁郁三秀
皇帝創始功冠萬古
唐哉虞哉巢許不知
我以為芝人以為薇
扣鐻

長謠白雲沾衣

霹靂引

七曜受署五氣調八荒來同萬國朝後來防風伏歐刀

走馬引

山空兮狗不吠雞不啼馬胡來兮躑躅而悲嘶吁嗟天馬警余兮以徙余敢寧止

思歸引 一曰離拘操

不覩宮中貴安知妾家貧火齋飾交疏蜀錦充下陳玉

饌不能名蘭膏自氤氲一解新王富春秋炫飾奪朝霞

奉妾金條脫永願托姻婭三千蛾眉女一一讓容華二

解妾人坐怵悒怵悒如探湯目視等埃塵腸類刀矢攻

蚤奉父母身為禮以亂終三解淇水浩無津方舟曷相

援先王未面命何以待黃泉怵營深宮裏天地狹如弦

四解殺身良不易苟遇誠亦非引領就高懸黃鳥為哀啼

我欲竟此曲此曲令心悲五解

又

思歸引歸東吳鼓余翼翱翔志所如泛七澤凌五湖觀
我釣所中悅愉雲鬱術波縈紆帷天燭星無恒居浮家
水獵樂有餘宜城稻松江鱸頰奏殮妾湛酤飽鳴琴醉
呼盧

榜棹歌

張翠蓋兮汎青翰
綸脩裾兮氣芬芬
其以蘭口欲吐兮
中闕之中心慚惶兮
貪奪之顧微賤兮
焉匹離君心妍
兮自色飛

採葛

欲明不明聞杼機臥薪君王來起之我今採葛以後時
欲明不明聞鏹斛臥薪君王日不休我今採葛以道遙

精列

獨何之天地相讐詛其間安得怡其間安得怡亮懷千
秋嚮焉能度一時願攀飛龍翼故里以徘徊故里以徘
徊飛龍騰天去鯁鱗來相依鯁鱗來相依眸子向内生
誰為辨雄雌誰為辨雄雌和光同其塵老氏我所師金

石隨年銷真人曠無期

對酒

對酒歌少年白髮蒙其顛
四坐且勿喧躑躅吞聲內相
憐欲有叙家世二千石
乘朱輪者將十人弱冠明經射
策甲第為郎無狀偃蹇不遷
無蔽蒂以藏其朱顏絳灌
將相大臣自愧其妍側目而
眴眴安令文墨操吏權斥
之去一往勿復言慚無賈生之
策彷徨公車靡階以自
前月請囊粟十百錢陛下萬壽
小臣歸田

日重光行

日重光拂扶桑耀嶠夷日重光天老乃復洗沐之日重
光左右五色菌離披日重光燦若明鏡火齊日重光萬
象同志仰昭回日重光告羲和勿頻揮日重光留晷且
為中日重光覆盆之燭鄙所希

月重輪行

繚繞霞虹太清之府燭龍者何煌煌炯若虞帝華瞳飛
鞅不周以方羲馭陛下皇后坐宮中各百千萬歲

步出夏門行

六神諸山淪連大壑北風勃來簸蕩不息帝命巨鰲更
負危揭冠簪東出以為碣石燭龍雙眸以為日月下苞
蒼蒼浩蕩靡極幸甚至哉歌以詠志

右觀滄海

孟冬十月王師振旅旌旗揚天鞞鐸萬舞橐駝駟駘不
知紀數犀毗黃金跪而銜組歸馬華山放牛桃林大酺
三日黔首懽靈幸甚至哉歌以詠志

右十月

西游秦中板屋以處東折宋魯逢掖章甫斷髮文身以
凌句吳燕趙慷慨彈鋏歌呼八方異施等若五時義問
休暢所底如歸幸甚至哉歌以詠志

右土不同

神龜支牀生理中絕不如剗腸逝而見筴干霄之材諡
曰檉檉風雨飄飄孤鳥托處縱生而雄厥名丈夫安能
百年與飲食俱幸甚至哉歌以詠志

右龜雖壽

平陵東行

鬱鬱平陵樹，日夜生秋風。風聲一何悲，樹色何朦朧。不
敢出聲啼，掩咽歌義公。平陵多貴豪，不為商與農。黃綬
二千石，墨綬侍中郎。出用牛車載，戶用金碧蒙。老少六
七輩，氣色何昂藏。口但新室臣，何論我高皇。嗟哉義公
里，榛棘復汙潢。狐兔歡索羣，魚鼈亦來宮。安得冥途軌，
側身以相從。

右本旨

又

平陵東車隆隆郭家小兒葬若翁葬若翁來送喪誰其
最賢槐里公槐里公多奇客迅如颺鷹虎如力虎如力
卒夷滅曷不將去擊胡貊

又

平陵東誰最雄父為丞相子侍中子侍中氣成虹黃金
不歸大司農大司農走錢龍丞相之室金為梁金為梁
玉為圮曷不舍去居天子

王子喬

王子喬變化白鶴長逍遙變化白鶴長逍遙下游來王
子喬璠玉為衣砂為冠垂玄裳朝謁紫清軒轅大道皇
誰者介廣成老公授爾浮丘之伯令爾吹笙復鼓簧下
視塵界三千霜今上聖靈發百祥安期之鹿離哉雙胡
弗至止相翱翔侑以紫芝薦瓊漿柏梁之臣前奏章今
上聖靈永無疆離披短翮角殷璘喏欲報帝還靡因

桂之樹行

桂之樹桂之樹乃在蒼梧之陽嶺曼衍而嶒嶸翠羽為
葉蒼蚪為株萼何歲蕤蓋敷黃如黃金粟赤如珊瑚珠
桂之樹僊者四五人駢駕鳳皇來謂是日精月華教爾
采服不衰一歲口澤馨二歲體骨輕三歲毛羽生朝見
上帝賜女麟車霓旌翱翔玉虛太清翱翔太清天為樂
不可言

釣竿行

饑飯渭水旁渴飲渭水流大魚絕餌去小魚不回頭不

知何王子施施來上鈞

滿歌行

為善無近名不見古人遜天下躬耕逃之渭水洗耳見
輕又言為惡無近刑不見古人佯狂漆身清質濁文卒
稱逸民桓文假仁乃霸四海盜跖脯肝以牖下死乾坤
失信剛柔安紀五星背躔焉所照理我欲為善善不可
為我欲為惡惡非所知刑名之間余其庶而何以尊之
儀狄我師棲山得玉將削而足泅海得珠將剖而肉不

如種田畝得林與粟家蓄五母雞二母彘一日一飽三日一醉出則止野歸則止舍不知有天無論在地東隣送喪西隣生兒寒暑為鑪風雨鼓之銷冶紅顏以就衰羸曠視今古曷如蜉蝣智者亡何聊以不憂王孫達生厥師莊周莊周怖死抑孰與儔

空城雀

雀不能飛向天又不能游深淵胡為刺促草莽間曷不愧其朝東而暮西決翼僅尋丈槍榆為天池皇皇者何

憂稻梁田家罝置正高張何不舍去復彷徨志命相就
罹禍殃

蛺蝶行

蛺蝶來踰苑牆為是百卉芬芳悲哉蛺蝶不覩百卉但
覩翩翩之燕銜哺其子燕有三子忽失其二燕乃舍我
而東西仰見一老鷓鴣耽耽下視喙血流離蛺蝶聳身而
奮飛顧謝此燕始謂爾彊曷不更哺其子令我擲揄道
旁今日樂相樂別後莫相忘

乾
坤
艮
巽
震
坎
離
兌

舟州四部稿卷四

欽定四庫全書

集部

弇州四部稿卷五
六

詳校官侍讀學士

臣陸伯焜

中書

臣劉源溥覆勘

總校官原任中允臣王燕緒

校對官檢討

臣盧應

謄錄監生

臣韓騰

欽定四庫全書

弇州四部稿卷五

明 王世貞 撰

詩部

擬古樂府五十九首

西門行

出西門塚纍纍車中幸有酒不飲奚之但復飲沈醉當
自知焉能前騶後殿束縛乃翁為雷大鼓爰鳴笙試問

冢中枯骨不為起聽飛霜激流徵六月清霜零即呼道
傍子為我辨其聲雖無故人鍾子期但操山水中所私
雖無故人鍾子期但操山水中所私相逢俠邪路輪仄
傷馬蹄與君非一體何用不相疑

又

步出城西門但見兩兩垂楊高枝自相膠低枝亦成行
昔者手植之不敢望人長十年不相遘覩此參天勢莫
當東家禿柏偃蹇氣欲盡令我箕踞歎息此樹傍人間

世一何茫茫丈夫宛轉間倏忽生輝光巧命搏參差奇
賢避頽頽扶杖且歸來兄呼醪嫂呼稀大嬾洗爵小嬾
前致辭俱覩百年樹不覩人生百歲時今日樂相樂何
用戚戚纏思悲

東門行

出東門曷不言歸我欲從九夷不齎八月糧未滿十二
駕駒蹄手操蒯緱劔囊裏一束書但趨咸陽道上鵲啄
烏棲竟何之竟何之東有霍家驃騎西有丞相屈釐黃

金如山風雨立前安用蒯緱束書為黃金如山風雨立
前安用蒯緱束書為咄女從九夷咸陽道上生不支

又

遥睇城東陌冠蓋鬱崢嶸主稱且盡觴客辭不勝情徒
御亦相屬昵昵作私聲古來涕淚地春草不易青生年
未期百過跡在長征撫悼髀肉消櫛悼鬢髮星白日為
風雷皇乾乍冥冥居人恬臥起道途失精靈弧矢固疇
志垂堂母乃輕

却東西行

黃鵠從東來飲啄且襄徊不知將何意延頸向我啼
渺行役子三載客東沂將托千仞風及我萬里歸聳身
從之去扶搖不支持一舉決雲漢再舉歷天池斂翼下
置我乃在弱水西弱水浩茫茫終古日月迷願邇更成
遙為恩亦何施不願故鄉歸不願黃鵠來但願得美酒
日進百千卮

秋胡行

寒暑易遭天地難為仁寒暑易遭天地難為仁重華作
相焉宥四臣周公雖聖不得親親魯用仲尼曷利士人
歌以言之天地難為仁 一解

晝夜相效日月難為明晝夜相效日月難為明幽谷節
屋伏陰卒萌象共滔天水土是馮岳薦何重帝言何輕
歌以言之日月難為明 二解

七雄鬪驅英佐亦何多七雄鬪驅英佐亦何多等智齊
力卒莫相加老驥皂伏致遠者駕豈必中才逢數則苛

歌以言之英佐亦何多

三解

脩辭曷量顯者自為工脩辭曷量顯者自為工等彼鴻
鵠唳霄則雄世無太師孰采民風槐里渺邈曷折充宗

歌以言之顯者自為工

四解

俗累易捐九州不足居俗累易捐九州不足居道逢僂
長自稱安期手執大藥其甘如飴謂女憤嫉秘莫肯貽
歌以言之九州不足居

五解

孤兒行

孤兒來乞食一何慘悽問汝父兄何之長跪答言父為
酒泉太守匈奴來遮貳師入酒泉血肉付梟與鷓有一
老胡繫我母馬蹄倏忽不見隱隱聞啼兄行賈海南十
載不得歸人云鯨波山立而血人安能遠相期孤兒中
氣咽不復更致辭我有匕首贈女令從材官雪女仇迫
暮無食窮冬乏衣形容皸瘃盡手足自相糝黃泉漸邇
白日易晡父仇雖重焉能奮飛

苦思行

帝母治金天戴勝光陸離弱水中間隔安能奉僊儀感
此青鳥音電轂下瑤池遣信要上元飄飄雙玉衣再拜
前致誠乞取五嶽之真形謂女胎性多淫殺母為慕長
生柏梁亘穹霄宇宙正佳兵北風淒淒白日就冥雖有
蟠桃不栽茂陵

當事君行

丈夫委質事君薄命多苦辛窈窕不勝冶容靡復奉清
塵雞皮者婦三少六宮當一身羊車輕薄誰子軋軋入

宮闈桃李乃擅陽春松柏推為薪已矣殆哉歸歟草莽
竟何陳

燕歌行

秋霜肅肅摧庭枯晨風何悲夜鳴諠使妾為遘不須臾
恍兮類君忽若無為君中夜起躊躇雕欄簌簌懸真珠
二十八宿羅天衢欲明未明焉所如君當為龍妾雲俱
衝颺在天忽驅之西流之蟾東飛烏樂往憂來不相虞
盛年冉冉辭人徂裁吟代哭中成吁安能為情自卷舒

其二

白日晚晚夜何其
蘭缸炷炷照妾悲
帶長髻短中自支
妾人少年工愁思
憂來無方不可治
丈夫桑弧誰製之
誰令瓌然不下帷
鴻鵠雙翻復為誰
援琴奏絃歌和詞
宮折商促指間離
白葛中裙衫弋綈
念君寒暄併一時
南山喬松青不移
雖有中堅色難期
願君歸來及時歸

妍歌

今日樂相樂與君恣
游遨霞車扶飈御
天酒汎星匏安

期羞大棗阿母薦蟠桃王子奏玉笙夫人擊雲璈月姊
將明鏡天孫奉織綃雙成扶入帳飛瓊脫我袍千年為
一宴萬年為一宵

古八變歌

秋風何慄慄惡我羅裳衣晝短不成匹中夜理鳴機晨
風俱南翔熠燿竟何之皚皚枝頭霜隱隱上蛾眉盛年
忽已過游子安用歸

同聲歌

今夕復何夕得奉君子歡明燭在高堂三星燦以爛
飲不逮終禱結自成寬綢繆非一狀要約故萬端感君
纏綿意報以中心肝願為黍與臕奉君朝夕餐願為縞
與絺備君衣中單二候願多夕三時願多寒金石有時
泐中懷長不刊鳴雞何咿喔北斗漸闌干欲起復彷徨
人生會面難

妾薄命

西家豔女羅敷柔肌金城土酥皎若清冰玉壺雙波灑

豔睛矐嬌啼芙蓉露珠吹氣蘭醒蕙蘇頭上倭墮俄俄
暖金雀釵婀娜鬢雲對侵翠蛾湘裙十二織羅衣袖無
風自波下隱雙蓮繡鞞柔荑飛梭流黃織成比翼鴛鴦
嬌歌激塵繞梁浮雲如掣不揚妙舞婉盼生光四坐粉
黛摧藏十六狂且見求要眇微言不酬黏竿挾彈遨游
涼颼脩脩葯裊徘徊顧影無儔畫永更長歲脩東隣冶
容少年娶婦曷鼻魁顏怨耦等誹齊憐目成色授神傳
沈吟却行不前命矣夫復何言

短歌行

置酒中堂伐絲比黃酒以益歡志人慨慷慨慄生跡類
此繁響盈盈在耳忽忽淪往灼灼其華朔凋春敷所並
枝葉不作根株勞我以人伊何莫遐天地偶爾逢之者
嗟仰窮二曜高不得掇頰即大壑深不得沒王喬安期
服食難量錮茲委蛻僅三千霜

長歌行

軒皇億萬紀三光恒若斯人生百年內譬若朝露晞前

者吾不作後者亦焉知平生異榮賤塚墓識為誰華椽
及膏畝安得遂相攜托體於子孫痛痾各自支株株同
根蒂葉葉自輕離蒙莊等彭殤終復脩文辭尼軻固隨
化垂言亦庶幾

又

答于鱗

昭昭陽春色令我好看姿庶草各自驕誰能念先姜秋
氣發鳴蟬噉噉多伏悲逝水但知東逝日但知西人生
堅強志乃欲與時違

其二

蜿蜿雲中龍煜煜雙飛翼扶侍日月車周旋於八極中
有芙蓉冠蛾眉何脩淑盼我若舊歡貽我藥五色顧戀
塵中樂徘徊不能食曠劫不再逢悵悵安所即

其三

白露秋澄澄溥我桂樹林愁思中夜發披衣不逮衿晨
風無停號蟋蟀時再吟舉頭見明月低頭淚溼靈明月
萬里光妾人萬里心願為隨光去萬里不能任北斗釀

酒漿南斗為我斟言欲解我憂憂來一何深

相逢行

相逢美少年俱在洛城東繡轂珊瑚鞭驅馬若游龍華
鞞臂蒼鷹馬後好妖童周道不肯分呵叱爭如風各言
父兄業不獨誇身雄小吏二千石大吏至三公男當執
金吾女當備椒房鐵券恕十死金書尚煌煌壁藏亡命
俠睚眦不肯空行旅為弛肩居者起相從不覩少年爭
安知富貴功

皇都篇

皇都麗宮闕柏梁復建章
列宿散金鋪馳道絕天閭
車聲屬旦暮馬足浩縱橫
丞相東閣開冠蓋脩成行
不愛丞相憐但愛侍中郎
宇宙銷黃金大海為壚缸
風雷白日變精靈俱走藏
昔日平津館今為鬪雞場

長干行

上客酒莫傾請聽長干行
長干十二高樓天矯若飛虹
迴飈却簷楣赤日眩雕甍
樓中何所有嬌女字傾城五

尺明珊瑚觀者無不驚姊妹不得驕父母不敢高聲流
盼灼朝霞緩齒蘭芳生頭上金雀釵一一銜珠璫腰間
瓊瑤珮行步中宮商鴛鴦生不識繡出便成雙十五嫁
小吏小吏焦仲卿三朝上府牘四夕踐府更府公拮据
不得寧十五休澣期中厨刺刺宰猪羊不見小吏還乃
過邯鄲倡邯鄲倡善為蠶不可方長干女守空房我我
鳳凰橋焉見飛且鳴淅淅天河水指影竟無形女身既
已非為婦空得名恒恐容華變薄命委秋霜溫衾不甘

暖涕淚沾衣裳

白頭吟 用本事本調

南山有匹鳥自呼為鳳凰雖復具五色不能顧其雙一

解昔者呼鳳皇鳳皇不成雙今者呼鳳皇鳳意不求皇

二解昔求一何難今飛一何易今去呼不來昔來推不

去 三解新人芙蓉花舊人芙蓉枝新人山作眉舊人霜

作眉 四解妾無百種態是君當心際妾無百種嗤是君

心別時 五解牀上五絃琴一絃今一心新絃終須斷舊

絃不可尋 六解

苦寒行

驅馬度陰山積雪何茫茫疾風四隅來馬首浩縱橫
高原無倚跡顧影僅為雙孤獸索其羣棲鳥向陽翔寒暑
客路深况乃異戎荒沈懷幽閨婦玉筋啼紅粧旭日未
及旦軋軋澁流黃年命不在已安能顧四方人生今失
職歲暮問他鄉

怨歌行

啼不必遡風而振柯淚不必決溜而傾河中心自鬱鬱
五情竟焉他吾顧松與枯衆視等春華冠裳為微纒文
語強相加隨涉詣扶桑弱檣試鯨波操者竟何言他人
其奈何念欲開耳目周體悉塵沙自非洪喬質焉能凌
紫霞

怨詩行

忠臣不可為良臣不可求李牧却秦師功多竟不侯朝
讒進郭開夕骨委荒丘千金賣社稷舉宗托仇讐蒙恬

破匈奴挾箠河南收長城五千里雉堞如雲浮趙高從
中制片紙下沙丘扶蘇掩袂啼一劍死陽周合若投膠
漆棄若覆水杯捐脰非所難誰為終國憂我欲寄此曲
此曲多悲思今日樂相樂別後莫相疑

獨漉篇

獨漉獨漉水清泥濁知人惟艱聖哲斯愆蓄豹捕鼠捷
不如狸狽裘施燠曷如綌絺煜煜綺羅服喪柰何郁郁
蘭蕙饑後稻禾騏驥千里水用曷神吐綬五色曷能絲

綸豈不懷賢在敵則讐雖有南威外遇莫求國之云亡
儉夫孔壬嗟彼負乘莫非行禽

烏生

烏生八九子營巢高樹顛得食不充腹置之咽嗉間八
九子爭向烏力不能任諸雛毛羽剝落皮骨憔悴尾畢
逋八九子翼以肥各自東西飛老烏夜悲啼血繼之八
九子爭食喧野田誰來念烏饑烏且死願天莫生烏但
生梟與鴟陛下仁聖海宇咸慶烏不返哺莫知故

野田黃雀行

黃雀摩天飛乃遭鷲鳥搏不遇弘農君微物焉見錄一

解

東家張羅網黏竿黏黃雀西家得黃雀置之巾箱中

哺食養毛羽縱之歸大空

二解

何以報弘農四世作三

公何以結信緣約指一雙環

三解

道逢白額虎帖尾復

低頭流矢在足心刺刺如有求不忍為拔矢踴躍登山

幻矯為風伯鞭燿為電光流

四解

返顧決一咀皮骨條

無存命亦不在大報亦不在思念此野田雀氣結不能

言五解

鞠歌行

狡容顏誇子都以適師冕同狂且承五絃嶧陽梧構爨
宿火讓焦枯案騶虞搏妖狐擾捷安得同韓盧驥骨立
仰晨鋪不遺伯樂竟鹽車鷹揚誰老匹夫徒手迫暮麓
無魚相仲父出囚拘霸齊曷繇管夷吾

君子行

莫以君子交斷絕小人歡小人蓄疑毒君子受其患絞

蜃豈不雄力能排丘山所遇無完物齒鏑如刀鏢大造
為餘種置之溟海間神龍不羞宅煦沫各相安所以太
丘長廣道以自全惻愴東京客達者悲其賢

上留田

晨興陟彼南岡上留田採薪不得盈筐上留田稍後食
時釜空上留田別室羅酒及漿上留田毳貉為衣葛裳
上留田手足寒燠異方上留田一解中夜暴客踰垣上
留田氣迫不得呼援上留田目中誰耶所思上留田捧

足鳥獸竄奔上留田

二解

冒刃者何衛兄上留田倉卒

親疎見情上留田俯肝掐心怦營上留田枯枝離披更

榮上留田

三解

度關山

度關山詰曲復崔嵬雖有車畏輪摧十步五坐泣且啼
啼聲一何悲疾風吹塵自我後來回望故鄉茫何覩哉
前觀黃河水水流何澆潏一夜胡馬過河邊草如削河
邊草如削安能更民居居民尚遠徙行子欲何之鳴梟

為好音豺虎亦規行四方不識人來稱弟與兄溫鐵益
知柔茹茶益知甘平生少自足臨難追故歡度關山那
得不沾衣日夜見去人寥寥歸者稀

前緩聲歌

天傾西北一如地之東南頽仰大造安得兩相兼猛獸
爪牙一何威欲搏雉鷺不能奮飛鯨魚跋浪雷奔焉見
走陸若人王子喬獨身化為鶴不能挈父母而逍遙賓
客滿堂前致辭願君福壽與天齊情知非真實且為進

金罍

置酒行

置酒高堂上樂聲慘不發手抱三鷗絃檀槽如秋月此
樂名為誰言是胡中出本以寫哀思云何虞賓客聽曲
各稱好竟令沈懷鬱繁響赴流光悠悠逝倉卒未坐而
楚衣一聽三歎息

悲哉行

四坐且罷歡聽我悲哉行悲從中心發輕言涕自零疾

風吹難散春陽不能平矯矯南山松屈為虯龍形干霄
自本性焉用美好稱寧為折蕙蘭安為令不芳但覩連
城碎誰覩改其光與世既殊轍各自伸所長悲哉復悲
哉古今尚茫茫

當牆欲高行

牆欲高雉堞何崔嵬室中之藏永無蓄蹻跼過之不能
竦身而奮飛我謂牆欲高彼謂曷不卑丈夫快舉事安
能兩相全當為讐敵忌莫受親戚憐

枯魚過河泣

魴鯉水中居寄聲於枯魚女欲顧儔匹不能保其軀主
飲過三爵短袖出中厨脯腊無不為還得我時否枯魚
泣寄聲魴鯉太不慈我當無女日女當有我時大海天
茫茫煦沫各相怡但覩長千歲焉覩後來菑

白石歌

白石爛饑為黍鑿鑿白干戈杵男何耕生遠戍女何織
生當戶腰鎌牧雞豚散走不復顧堯舜邈生不逢湯與

武義輪倉皇焉得暮人歟鬼耶悲哉伍

補鏡歌四章

樂府唯鏡歌歌吹不易擬亦不能盡擬後有四
唯名存而辭闕余因為補之亦取其近似而已
不能如優孟之抵掌也

釣竿

釣竿青灘澁釣餌一何芬
青且肥小魚疾走不敢回顧
大魚施施來大魚恒苦飽
小魚恒苦饑大魚既失故小

魚施施去乃不知東有屬玉鷓鷯西有鷗與鷺

玄雲

玄雲衡空自西徂東曖曖承日萬族無光風伯為前導
雨師應後馳膏我畛畝惠我蒸黎嗟嗟惠我蒸黎天公
不任怨亦不任受德縣官大酺懽樂無極

務成

崇伯子禹佐舜平水土告成上皇皇錫之大夏化益佐
禹亂天下告成上皇皇屈為夏輔功施既殊等引分安

所存吁吁胡至如務成子光乃遽湛齋霜霰自表堅曷
捐天地仁

黃雀

黃雀兒頭如粟翅如雙桃葉飛鳴一何翾捷黃雀兒三
時常苦饑一時不饑得身肥前有網羅不能奮飛嗟嗟
生饑曷與死飽充君之鼎俎曷若不利君之禾稻

豫章行

豫章富竒植掩冉經大年上摩千仞霄下蔭百頃田飛

羽無窺地棲足莫覩天精靈若附馮風雷自糝纏東都
宏制作制作首明堂萬材悉以周所希在棟梁一經匠
氏顧寧辭剪刀傷毀質應世求兩重竟何當

董逃行

仰見東京鬱盤城郭半摧不完雖有室家無烟熒熒赤
燼幾寒一解道途者何啼聲父呼他人不應血肉雜潦

縱橫夢不覩織與耕二解旌旄撒沓虎賁下有金紫紛

紛青天無飈忽塵縣官倉皇曷云三解西京高帝所方

萬戶枳棘夷傷我我未央建章百一鄙塢蓋藏

四解 恍

矯我公司徒獨任捐體掃除煥若一氣昭蘇延敵追讐

大屠

五解

吁嗟篇

吁嗟得為人生世胡不宜瞽行趨荆棘側足舍周達誰
謂八紘廣東身漸如絲越舟而向北齊轅而更西盼睽
絕窮途安得展光輝汎汎江湖萍預欲遠相期明月雖
有光不照濁水泥與世既殊適吁嗟竟安歸

蒲生篇

青青水中蒲結根何卑弱甘無長年固所望歸履席雖
蹈剪刈傷微質終有托恒恐秋霜至百卉坐俱索榮茂
本不偕云胡先搖落感此中鬱蒸喟焉芳華爍君明倘
垂照埽除安為薄

煌煌京洛行

煌煌京洛肇跡光武服行共儉奄宅中土天關玉門以
界夷夏外戶不閉中夜行旅一解爰及二宗肅雖明堂

疇其賓者三老五更邑多藏餼畝棲羸糧聲實華鬯西

京有光

二解

煌煌京洛常侍燬之燬伊成之司徒伯始

常侍競哉蠹齧天紀司徒棲棲不卹其緯

三解

煌煌京

洛董逃仇之仇伊毆之將軍何侯惜彼董矣卒顛厥室

嗟彼何矣自貽伊戚

四解

門有車馬客行

上客停輪筐小媚罷流黃小婦出肅客呼水進酒漿問
客何方來客亦不肯言但覩雙荔枝朱實自殷瀾謝客

忽唯昔荔枝生南海欲因求歡耗車馬去不待炎洲翡翠鳥雙雙互相樂寧知鴻鴈苦飛不度湘嶽

善哉行

唯昔帝辛任志淫刑三分失二施然自矜一解唯周王

發純心嚮賢諸侯八百虎賁三千二解大白帝辛小白

妲已母言臣分寔示君軌三解武庚何聖管蔡何憐疇

無父母疇無季昆四解桀為不道湯放南巢周有桓文

以遏其驕五解秦政卑臣二世而滅契綸海宇為千秋

孽六解上嚴昊天下嚴匹夫黃屋左纛曾為而軀七解

又

今胡不樂烹鯉臭鴈簾管嘈雜衆大稱善一解天光漸

傾咸謂無歸織阿受御嗣其揚輝二解客有韓娥儂行

曼歌哀激當心涕泗滂沱三解斯為相國卒霸秦世晨

朝百僚夕送東市四解錯衣朝衣謂調兵食忽見前後

森如霜戟五解哀樂矢催當身乃知酒不速瀝日是之

離六解

太山梁甫吟

鬼鬼天門山鬱鬱梁父禪
金泥闕玉冊榮光曠昭倩
賢聖七十二其名幾稱見
何況於謀臣飄淪同春霰
闕里困韋裳千秋麗河漢
亦有抱膝人居然恬貧賤

吳趨行

上客且緩驂請聽吳趨行
太伯讓周王剪髮竄蠻荆
季子守遺節屈體臣後生
要離捐肢體伍員抉目睛
豈若被裘子兼復韜其名
言游佩端委文學啓休明
賃舂無

凡客門卒亦僂卿震澤含變化大海發精靈焉類十室
邑步趨恒自矜

磐石篇

山石何盤盤水流何濺濺濺濺東流水乃在磐石間長
與本根辭一往竟不還委蛇東到海經過諸神山巨鼇
來戲游日月雙迴旋珊瑚鮫人珠光彩爛糾纏丹鰓鬚
如戟龍炬照神淵曠蕩無終止大壑易淪漣磐石有本
性屹立竟何言

白馬篇

白馬西北馳，矯若雲中電。胡錦作障泥，絡頭珊瑚鈿。片
片汗桃花，噴嘶赤瓊霰。捐身出大漠，雄才為君見。祁連
春如赭，白日蒼黃變。所至自無堅，騰驍必居先。橫懸單
于首，馳奏未央殿。改從中黃服，遂壓天閑選。首宿春正
饒，力疲不成咽。遺像在凌烟，英風颯然變。亮無百年物，
得施軀不賤。

邯鄲才人嫁為廝養卒婦

高若升高木幽若棲幽谷雨落歸川澤浮雲遂不屬飛
萼謝瓊枝卒為泥中辱西施苧羅村紅顏初殊俗朝為
民家女暮顛吳宮宿趙王有才人皎潔明如玉一朝事
勢異養卒來相逐兩世當一身榮衰何其促寄言宮中
侶為恩誰終篤

齊謳行

莫以敖辟譏聽我奏齊謳右顧枕岱宗左負滄海流維
昔師尚父建冊表營丘四履征不庭一鉞奠成周烈哉

桓公筴首政舉其讐九合匪兵車衣食東諸侯妖呂蕩
氛波炎燼幾不收哀王倡大義絳灌始協謀九有提一
隅三勲古無儔亂民矜炙輶養客悲蒯緱小惠薄陳常
非和誚梁丘憤誂殺士桃刺促媚姬襄鄙矣牛山宴泣
涕言爽鳩

十五

騁望平原路鬱葱何所有孤兔不足陳麋鹿竄亂走鹿
走何迷離血肉俄繚繞饑鷹食不多飽犬食亦少馬尾

捎歸來鷺於退飛鳥

弇州四部稿卷五